



On augurio? Vegnémose incontro!

Xe qua l'Ano Novo: tempo de auguri, prevision e promesse.

Se vorìa védare realizà tante robe, ma soratuto la pace, l'armonia, el nare d'acordo

Ne xe stà insegnà che la vita la xe on dono, ma al tempo stesso se n'acorzemo che la xe na lotta continua: tra chi governa e chi xe governà, tra siori e poareti, tra paroni e dipendenti, tra veci e zóvani, tra marìo e mojere, tra pari e fiò, tra chi va in leto e chi fa bordelo, tra chi ghe piase sparare i bòti de fine ano e chi ghe dà fastidio i sbari...

Se fermemo qua par tirare el fià, ma se podarìa nar 'vanti fin a si-diarse e a stufare chi ne leze: xe mèjo che se "vegnemo incontro" e che zerchemo de capirse.

In medio stat virtus ne ga insegnà i latini. Xe vero: se le robe de la vita le va male, xe proprio parché no acetemo "reciprocamente" de rinunciare a na parte del nostro tutto. Vardemo el mondo: pi de 1 miliardo de persone

sofre la fame; ogni 6 secondi un putin more de fame. On pasto de manco a testa ne l'arco de on mese, de noantri che podemo permétarse tri pasti al dì (e 'ncora se lagnemo!) el podarìa salvare tante creature.

Ciapemo le fameje: le xe ormai poche quele che riva a festejare i 10, i 15, i 25 o i 50 ani de matrimonio. L'omo e la dona, marìo e

mojere, i fa senpre pi fadiga a capirse, a jutarse, a vegnerse pazientemente incontro. Conseguenza? Quando la va ben, separazion e divorzi; có la va male, ofese, bòte, violenza e morte.

Vardemo el mondo del laoro: el goadagno, el bilancio, i "dividendi" ai soci, i capitài trasferii a l'èstero i se scontra continuamente co la necessità e el dirito al posto de laoro.

Nel canpo de la scola: ghe sarà



anca casi particolari, ma el pi de le volte i studenti i pretende de savérgane na pàgina pi del libro. E 'lora contestazion, siòpari, ati de violenza contro i professori, contro le istituzioni, i programmi, le materie de studio... contro anca on solo rinpròvaro al toso che va ramengo tri dì de la settimana invezze de nare a scola.

Le robe no le va mèjo nel mon-

do de la Sanità. No podemo negare che ghe xe de i casi de "malasanità", ma ormai el malà ghe ne sa pi del dotore che, prima de vèrzare boca, de diagnosticare o de tajare, el te fa firmare on fraco de carte.

E del poro "Cristo in crose"? Parfin quello semo rivà a métare in discussione, a contestare la so presenza là indove el sta a ricordarne quello che dovemo fare par nare 'vanti senza crearse on inferno par quei quatro dì che semo qua in tera.

E col nostro dialetto o lingua vènetà? Quando xe che se metaremo d'acordo so 'l modo de scriverlo? Tuti pretende de savere, de avere la verità in scarsela e invezze no la ghemo nissun! Se ghe volemo ben a sta "lingua del cuore", dovemo vegnerse incontro e métarse a camminare tuti so on'unica strada e no védare pi zerti spègazi come "gà, g'a, g'à, g'ha, ghà" al posto de "ga" ... "gò, g'o, g'ò, g'ho, ghò" al posto de "go" o calcosa altro.

Dunque, démosse na regolada, vegnémose incontro e par l'ANO NOVO, 'pena scuminzià, gavaremo la pace, l'acordo e na convivenza pi civile.

***BON 2010 a Letori, Colaboratori, Inserzionisti
da la Redassion e da l'Editoriale Padova***